

光緒鎮海縣志

鎮海縣志卷二十三

人物傳四

國朝一

周謙字吉人少精儒業順治元年隨孔有德征粵授南海教授尋陞江西峽江知縣地瘠田蕪士民素苦征斂謙履畝繪圖請諸巡撫多所豁免閭閻咸感其惠後罷職客遊淮楚閒晚年好爲詩古文尤工畫蘭邑人至今寶之

唐志

梅南遠字味元父爲縣掾有遺戍者值妻嫂爲謀展行期一獄株連三十餘人方冬月俱老弱不堪道路告之邑令得免省解人皆稱其陰德南遠幼負軼才長補諸生屢應省試不售明魯王時嘗召爲監紀知事必無成解不受旣

而浙東盡降鎮將王茂才雅識南遠薦於征粵之固山佟某既入嶺南南遠謂固山曰五羊月城瀕海數十步令掘爲河渠戰艦得傍城進則步履可登何必環攻而後勝也固山然之竟下廣州以功授瓊州知府時瓊尙負嶠大帥將克而屠之南遠策一騎先馳入招撫閩郡恃以無恐民勒碑紀其德有南海全仗一枝梅之語民病疫禱於城隍神七晝夜幾忘寢食疫癘竟息復以諸邑私派浮於正供請於上官嚴革其弊明年有反側者檄至南遠力不能拒乃納印於兵使者避之佛山鎮已而事平在位者多得罪獨南遠以潔身先去制府疏復原官命方下而南遠疾卒

時順治九年也

天恩集

李如珪字玉叔唐之長子例襲世職以補諸生讓於弟如璋弟分祿之半以餉如珪曰服官者食祿吾書生何敢虛糜朝廷精辭不受順治四年以貢授廣甯知縣時粵東初下如珪抵任撫綏瘡痍朝夕拮据巡撫蕭啟元手書清表百城褒之旋以盡瘁卒子懋勳字敬升年十二遊庠後以恩貢隨父之官父死上官檄懋勳署廣州教授旣而辭職歸服闋知交城縣交田河淤水淺而賦特重懋勳請於御史減之俗業旣刈以生上官取之無藝又請御史節以額交地當孔道車轄往來甚繁懋勳費悉已出絕不索諸里甲政聲大起歿於任

天愚集參
乾隆志

任德敏字捷之文華孫性孝母丁氏治家嚴時有所不悅

輒長跪請責少好莊列及唐宋八家文下筆滔滔數千言
爲人瀟灑喜宏獎風雅不屑苟同流俗順治八年以恩貢
授通判改潯州經歷適當兵燹之餘奉檄綏輯遺黎循聲
憇著有宦死於潯者妻子甚貧分俸贍之又爲請於上官
給道里費始得歸與修府志考訂精覈德敏先嘗問二程
子讀書處人無知者至是搜求古蹟知在郡城外數十里
蘿叢巖乃披荆棘親自訪之作記以示潯人署宜山縣案乾隆志繫署宜山於官兵馬司下誤攷謝景昌撰任捷之傳係卒於兵馬司任則攝篆宜山當在前爲潯州經歷時
首定苗亂上撫苗條議案謝傳作撫蠻議上之監司任爲經歷時與乾隆志互異邑多
虎災設法除之復葺學宮進諸生之秀者課以文字暇輒
坐對簡編晨夕不釋手或以吟詠自娛時稱爲文學吏丁

外艱同里服闋以原官補思州地更荒僻籌畫盡心守職

如在潯時康熙十一年陞南城兵馬司副將擢長至有事

郊壇蚤起除道感寒疾卒德敏性嗜金石嘗歸自潯州友

人疑其多得廣南明珠犀象及發槩裝視之有石刻四一

爲夫子燕居像

案許應禎與裝詩序像出唐吳道子手至宋嘉定時鑄之潯州署中與曲阜所刻先

師像相似但背多

一劍髯固無異也一爲磨崖碑案詩序磨崖在道州其之

畫分

一爲柳碑一爲元祐黨人碑

案詩序黨人碑在桂林龍隱洞邊漫已半皆

相與大笑同里許應禎有粵裝詩紀之

唐志彙參詩文草創文獻庫刻

張翼字燕及少孤育於母俞氏長爲諸生有聲登順治九

年進士知肥鄉縣士囂民悍翼爲均里徭嚴保甲勵士習

由是民鮮爲盜而士知尙學其婦女或相詬許輒投崖自

繆翼嚴禁凡夫視其婦死不救者坐風寢息邑濱漳河易於衝決積歲病民翼築隄以捍露宿水次默禱於神感大風壅沙之異決口不隄築而塞民德之立碑紀焉入爲刑部主事晉郎中持法務平多所矜釋丁內艱歸卒

曹府志

屠粹忠字純甫順治十五年進士知封邱縣時邑遭河患城垣廡舍傾頽殆盡前令日艤舟以聽事粹忠至築土誅茅粗立官署左右置草舍數十間招集流亡居之巡行城址出磚甃土中充雉堞之用鳩工修築不兩月城垣如故一日水暴漲堤崩粹忠率眾往見水勢洶湧不可遏坐隄上慟哭願以身當洪流爲萬民乞命是夜水卽退時布政使徐化民有事大名取道封邑忽見水平歎曰河伯且爲

爾効靈況我輩乎歲大旱禾黍盡焦民思逃散粹忠齋戒
禱赤日中不少息夜夢城隍神告曰寅日雨已日晴何如
粹忠寤卽出示安民告以神語至期果一雨三日士民歡
慶是年穀倍登人皆謂精誠所致云在任十載政聲報最
康熙十年陞禮科給事中首疏請復歲試士氣之振實重
賴焉江南巡撫議題州縣外補粹忠疏言爵賞宜從中出
與時不合乞終養歸久之服闋補兵科陞工科都給事中
三十六年淮揚大水上便民十要疏語皆切中陞大理寺
丞旋授奉天府丞晉大理少卿四十一年擢兵部右侍郎
明年陞本部尙書先是

聖祖仁皇帝以粹忠老年矍鑠書修齡堂匾額賜之旣又

賜臨趙孟頫行書曰白鹿城頭百萬兵碧油幢下一書生
如今始識爲儒貴臥聽元戎報五更乃知爲大司馬之豫
兆也卒官

曹府志

案曰屠粹忠陳錫嘏盧宜張翼皆鄞產而舊志選
舉均載其姓氏以諸人實占籍定海也故爲補入

列傳

方啟焜字莖英康熙二年歲貢司訓湯溪十四年廷議大
學裁訓導中小學裁教諭啟焜上言士第年力學予以一
命榮亦所以培士氣也裁非便并言歲貢必親赴廷試貧
士往反維艱士林壯之其在教席崇經術恤孤寒諸生感
其德祀於湯溪名宦祠

乾隆志

案曰廷議裁學官方啟焜官僅司訓分難上言或
上書於大吏耳抑

國初尙沿明制教官亦得言事耶

薛士學初名士珪字五玉三才從子幼而敏慧其叔母李
守節而教育之年十七補諸生喜讀書目短視俯首就案
晝夜無閒至燈火蒸帽而不知久之博通羣籍丹黃甲乙
罔不精確爲文原本六經而取裁於史質實典茂自成一
家賦性高簡榮利聲譽不以介胸偶閭黨譙集坐有談朝
市事者必正色拒之年未艾棄去場屋旋貢太學亦不赴
好茗飲飲或連數甌嘗曰吾生平無他可傳可傳者獨此
耳晚益有志理學每得宋元儒先之書輒盥櫛手鈔之日

與其徒講道論義孳孳不已邑令唐鴻舉慕其賢屏騶從
造門謝不見亟請則曰某布衣誼不當私謁令尹必欲見
朔旦學宮可矣及期行相見禮外無一語及他事時論高
之卒年八十餘學者稱爲書巖先生兄士琬字孟玉諸生
明崇禎時內監某奉詔有事浙東至縣文士見者各有贈
遺學官邀士琬往獨辭之不去

書巖集參
蛟川備志

王又曾字亦沂其先世良明建文時爲浙江按察使聞燕
兵入都合署自焚成祖戍其子於昌國後徙家定海又曾
早失怙恃大母撫養之年十七補諸生研究經史抉摘奧
窔多先儒所未發與同里薛士學齊名時浙河以東文社
方盛聞其才爭相招致又曾辭曰結納以博名譽華士所

爲吾不願也叛將張國柱縱兵肆掠又曾負大母攜幼弟
奔避深山及歸室被毀授徒以供菽水嘗有里役之累破
產救之大母歿廬墓六載鄉黨稱其孝尋爲鵲湖書院山
長慨然慕紫陽象山之爲人與諸生談論道義亹亹不倦
學使鄭開極額其居曰亦文中子未幾歸而講學於家從
遊日眾邑令黃宮柱延爲鄉賓丰儀俊偉矩度雍容聚觀
者咸嘖嘖歎息卒年七十餘又曾學問皆從實踐中來爲
人深自韜晦初與陳錫嘏最契互以經義相質及錫嘏官
翰林又曾不復修一札焉學者稱爲魯閭先生子疇性孝
父卒卽不入室設榻母傍十三載母八十二將卒曰吾素
憂汝弱不意今餘年賴汝活也疇以體弱善攝生至七十

卒值暑月衣單易簪時猶整袂不使見體云

陳錫嘏撰傳
參乾隆志

郎汝望字枚簡一字雙梧諸生博覽典籍工吟詠與謝光

昌謝緒章沈從約諸人相倡和文亦務崇先正督學顏光

啟彭始搏校士甯波皆有國士之目邑令唐鴻舉延主講

席門弟子多先後掇取巍科晚年尤精韻學子作霖字起

嚴一字寶山天姿穎異讀書數行竝下爲文不移晷而輒

就中康熙四十八年進士知濟陽縣濬河築隄多行惠政

濟人祀之名宦

乾隆志參數川
詩話濟陽縣志

陳鴻達字士楷號式之幼穎敏過目輒成誦長擅經濟才

總兵常進功延致幕下相得甚歡後歷兩粵三輔閒諸貴

人稔其幹略欲題以牧宰之任固辭不受人服其高

唐志
案

樊昂字子威指揮懋之後諸生爲人冲和爾雅與陳昌統
爲友聞見最廣同里張懋延編明季遺老傳就昂訂正焉
閒喜爲詩有風人之致晚以耆齒碩德爲鄉里所重蛟川詩話
胡嗣佐諸生守蠱上之節食貧守約與兄弟甚友愛工於
詩有聊以吟同里范兆芝周西管見而評定焉門人王鶴
遷字東臯亦能詩有集蛟川詩話同時鄭宗翰字翼宸沈潛力
學品行孝友鄉評重之值明季遂不事舉業專心著述卒
年八十三楊琳撰墓志

虞二球字天玉別字龍滄父一稷見孝義傳二球幼秉殊
質博覽能文爲諸生二十載居貧守約絕不干預外事順
治十五年成進士康熙三年選授安化知縣與慶陽知府

傅宏烈相得甚歡適縣之南鄉有悍民以逋賦擊死吏胥知府聞之欲往勦二球言此殆前令催科失次第積玩致然令今親往繫之足矣何勦也卽策馬至其地民數百家已驚惶將他徙二球慰之曰爾曹何罪吾治殺隸者眾見從者僅數人又不持兵械遂安居無恐而悍民二人卒伏法知府歎息以爲賢秩未滿以治行高等徵爲兵部主事晉員外郎八年典試山東得顏光猷丁暉等皆知名士十年陞戶部四川司郎中十二年出爲江南按察使僉事提督學政勤於閱卷搜取博洽之儒如崇明顧藻青浦陸祖脩王師旦王詰生華亭陳嘉璧無錫周宜振俱爲二球所識拔有鎮江李虎文者以高才久應童子試尤爲扼抑二

球一見輒錄取之諸人後皆鄉舉成進士吳下咸稱二球
爲知人尋以底護士子爲總督劾奏罷官歸家居閉戶讀
書山人閭巷不改寒素捐貲與同里謝燕昌重建啟聖祠
生平孝事父母友愛兄弟行誼肫然爲制舉文採羣說而
折衷於朱子後學多師之著有四書講義尤熟資治通鑑
能詳悉其本末晚學爲詩風藻婉逸氣格逼似唐賢詩成
手自書之字畫秀勁可愛卒年六十有二

謝光昌
撰墓志

謝泰交字時際號天章瀚之子幼穎敏博覽經史工詩古文
詞性至孝父病疽親爲吮吮歿則號慟泣血及營葬躬
執舂搗爲傭僕先服闋猶時至墓所哀慕如初喪賑施宗
黨家無餘貲人皆重其行誼順治十一年貢入太學

廷試

章皇帝以防海靖寇機宜爲問泰交夙畱心經濟悉海上情形具以意對洋灑幾及萬言

上閱之大喜置第一以知縣用會大軍平舟山欲棄其地泰交自都中歸獻議督府謂滄洲居南北二洋中吳與閩之交會外以犄角甯紹台內以遮捍杭嘉以東七郡土沃宜穀魚鹽蜃蛤竹木之利可給數萬人之食復分條形勝繪圖上之尋知棄議已決又言於牧守謂七十二畧之人一旦內徙苟急其期會將有湛溺離散之患宜遣使者分護擇近地爲安集戒營士弗得有侵擾遷民要策也旣而踰險轉徙凍餒載道泰交自出囿粟救其困流民咸德之

旋中順天鄉試歸里未幾卒年四十八

梅邨集參
乾隆志

謝榮昌字慶臣泰定子順治十五年進士授定興知縣地當京畿要衝役重差繁榮昌定爲均徭之法又以驛馬不足每責里甲代雇以應民甚苦之乃先期貸銀往關外市馬馬充而驛給其害遂除時功令嚴窩盜奸人覘民殷實僞逃以自首則其家立破名曰拋虎榮昌懸重賞募健役迹逃人之所從來一入境輒被擒縛問左帖然諸生馬揚武父爲讎家所殺擬抵罪會赦得釋揚武痛父冤弗仲乘其出獄擊殺之因自逮繫榮昌閱舊牘歎曰此孝子也亟引公羊復仇義力請上官出之且白諸學使者復其衣巾邑之北河有明楊繼盛祠歲久爲沙所沖已就圯榮昌躬

自相度擇南岸高壤卜築而重新之改知房山民有襁負從者康熙三年陞東城兵馬司指揮丁外艱歸未終喪以哀毀卒年四十

謝師昌撰傳

謝得昌字全者泰宗長子少習韜略父令番禺時奉檄勦尚寇得昌年方總角輒能躍馬從軍入箐篁山澗中遍迹其逆營布柵處出而一一指數之及長博極羣書累試不售順治十八年始由恩貢考授州同知天性至孝父病肺癰供藥餌進衾裯奉盥櫛得昌悉躬親之夜則帷燈默坐達旦不倦兼旬未嘗一卽牀褥父既歿歲時祭奠必匍匐泣拜晚年猶扶疾省父墓有子六人緒恆緒敷緒承緒顯緒止緒高姿皆英秀得昌命各治所習經其六經自博士所

邇傳註外詩則毛公而下以及華谷須溪春秋則左氏高
亦以至啖趙之解疑陸韋之編例禮則三禮大戴與白虎
義劉敞補亡皆熟誦之晨夕講論以晰其精微同里薛士
學嘗見而歎息謂可爲父兄之訓子弟者式卒年七十一
緒恆緒敷緒顯緒高別有傳緒承字子家諸生緒正字子
誼早補諸生父歿哀毀過甚逾歲而卒

書巖集參
乾隆志

謝歸昌字靈昭泰階子受業薛士玪研究經史深爲士玪
所契重順治八年明大學士張肯堂殉難潯洲時歸昌方
以事渡海所寓與肯堂之宅近見雪交亭下從死者骸骨
纍纍乃拊撫置大甕中埋之立石書張相國墓人皆義之
尋由拔貢入太學

廷試高等康熙五年授河南固始知縣丰裁嚴峻請託不行七年調江南碭山值地震廬舍傾圮戶口逃亡歸昌招徠撫循命伐蘆抵課課無缺復給牛犁耕具俾墾荒土流民漸復諸生楊文輝積學士也因被災積逋至八十餘金迫於追呼竄匿他方歸昌廉其素行招之歸代償其賦延爲子弟師碭邑濱河方興郭家樓隄工而河督亦以大工分派各縣歸昌憫民窮不堪重役懇陳得免由是眾力不困隄工告竣十一年移江西德化地當孔道往來絡繹歸昌酌量設款動支爲供應貧民免擾累修先賢陶靖節墓作和陶詩一卷三載以足疾乞歸士民餞送十里許家居

著述自娛卒年八十

南齊文約參書
歷集乾隆志

謝景昌字大周泰宗子童時能讀父所錄經史諸書及長
補諸生慈谿姜宸英同里薛士學見其文皆歎賞之已而
累試不售安之泊如也父歿母患疾晝夕侍湯藥不解帶
者數年家不戒於火於他物無所取獨抱先人遺集數百
卷出灰燼中時對之泣下以不得重鐫爲憾生平好遊覽
名勝晚尤矍鑠登候濤山與羣從彈琴賦詩歸寢疾三日
而歿年七十二子緒宏字子任博通羣籍工於詩文性孝
母染沈疴盡鬻其室之服飾爲醫藥資康熙三十六年由
拔貢入太學旋中順天鄉試卒年五十六緒惇別有傳謝師

昌撰傳參

乾隆志

謝諤昌字殿侯泰宗季子諸生性沈靜無聲色嗜好吟詠

之餘正襟危坐篤於孝友父歿奉母必盡誠敬當侍食時每陳說古今史傳紀載事蹟嘈雜兒女啼笑竝作翼博老人歡後入京由太學經年忽患痰逆將死值從弟兆昌兄子緒光在邸與訣乃不能言引緒光手以指畫大人二字於掌中遂瞑其死不忘親如此子緒貞緒欽竝以文名一藝出書賈競傳寫宜興儲欣評曰絕似蘇穎濱先生

乾隆志

緒欽子雲祚字巖英康熙五十二年舉人官內閣中書奉

使四川丈量屯田復命引見授建甯知縣

案家傳言由建甯知縣行取入

京奉使川省丈田以分府用誤

政績卓著大得士民心後改三臺乞休歸

卒年六十八

周紹龍撰序

謝兆昌字瞻在泰臻子爲從父泰登後少負殊質博學能

文家貧兄弟三人常易衣以出愉愉如也康熙六年成進士授宏文院庶吉士八年遷廣東道監察御史掌山西道事九年監試會闈十七年補山東道掌河南道事在臺抗直不回嘗彈劾中貴人錚錚有聲會罪人充烏喇者多死兆昌偕同列言

皇上好生之德審錄諸囚凡大辟減一等流烏喇今其地在塞外極邊至者無一生還是仍與殺之同請恩免烏喇之戍

上從其言出巡長蘆恤商剔弊釐政肅清前後章疏共數十上皆人所不敢言者二十三年以病乞休

案陳廷敬撰謝燕昌墓志

康熙二十二年十月歸昌卒弟兆昌聞其杜門不出與邵

京將歸據是侍御之乞休實爲兄喪故也

元觀傳嘉議王諭諸人爲吟友遊覽山林愴然物外復以
邑中遺文衰落振拾所聞集而梓之尤敦舊誼少時嘗爲
戚友范兆芝所賞識至是兆芝久死乃與從兄歸昌出貲
葬其兩世性耿介不喜詣當道惟東錢湖爲鄞人築隄壅
水崇邱一鄉田畝灌溉無資兆昌始謁郡守力陳利害復
其舊版畝皆德之卒年七十七從子緒彥案緒彥字又文
康熙二十一年進士授內閣中書澹於仕進日偕其叔賦
詩論文物望甚重人以爲東山二謝子緒章字漢倬一字
北溟諸生好讀書工古文詞屢試不售父執某憐其才欲
陰爲之地緒章毅然卻之不屑也構見山書屋於城北隅
以詩酒自娛兼善鼓琴所交皆一時名士與同郡李嚳東

門鄭性南谿萬承勳西郭尤契合稱為四明四友好事者

給以為圖年五十四卒

閒居集參青門集曹府志鮑琦亭集蛟川詩話

邵元觀字賓王一字亦存似歐之子立身清約工古文詞

著作甚多尤精於詩同里謝光昌最稱許之中康熙三十

四年舉人官山陰教諭子師瞻字子邁由太學生授縣丞

亦能詩

蛟川耆舊詩參蛟川詩話

朱俊昱字仲庵康熙閒為雲南永平典史地界苗叛服不

常俊昱佐令綏輯苗人悅服叩關請貢臺使出犒拂其意

立譚乃以俊昱素得苗心檄令代往至境深入反覆宣化

苗人數千從土穴中擁出莫不環呼羅拜從此帖服俊昱

以勞瘁歸遂卒大吏憐之賜金馳驛歸葬百姓遮道哭奠

苗人聞之亦爲涕泣焚楮

乾隆志

陸定國字駿生初業懦弱冠入行伍技勇嫻熟以同仇敵愾自期康熙十五年大嵐寇入郡境定國充提帥前鋒隨征所向無前連發矢射賊首三人殪之賊以排鎗擊傷卒恩卹威遠將軍御史謝兆昌爲之贊曰弈弈我公弱冠從戎穿楊超軼三箭名雄征勦大嵐膽壯建功領兵搗穴殞軀何忠芳垂千古勲懋甬東

唐志案

吳江偉字友健號石夫

案蘇州府志作號蛟門

諸生好讀書旁涉天

象堪輿之學康熙三年閏六月任蘇州管糧通判署守事兼攝吳縣并權政理煩治劇肆應裕如調署太倉州十年二月巡撫馬祐令江偉同蘇州同知于階丈勘劉河淤塞

諸道督工濬治十月以報解銀兩事褫職

案馬巡撫報濬河完工疏分督

夫工係太倉州署印革職通判吳旋卒先是邑之穿山連

江偉等據是濬河亦有勞績也年歉收鄉人正供無所出江偉鬻己產代爲償人免追呼

之憂及江偉歿於官被澤者千里赴弔焉至今父老猶感

其義

乾隆志參蘇州府志太倉州志

案曰乾隆志言耿精忠謀不軌聞江偉名虜之優

以禮江偉私語焦思能曰余輩被虜賊所以敗也

明日駕舟入幕府具以虛實告都督重之遂任蘇

州別駕其事不確據蘇州府志江偉於康熙三年

官蘇州通判十年罷職而耿精忠之反在康熙十

三年則被虜賊中之說明係傳聞之誤故辨證之

以見舊志之訛云

陳錫嘏字介眉幼慧入小學時使之屬對應聲奇中讀孟子至百里奚不諫輒作論非之年十五補博士弟子家貧授徒嘗應邑令之聘鄉人知令雅重錫嘏以是求關說者無虛日錫嘏在署數年未嘗一應受學於黃宗羲集同志爲講經會窮經論道有固執詰難者不遽折之徐以微理辨證無不心服康熙十四年舉鄉試第一明年成進士改庶吉士授編修奉

命修纂皇輿表鑑古輯覽二書書成進呈會講官員缺上引見詹翰諸臣獨命錫嘏至前細詢履歷奏對良久舉朝咸屬目之十八年交會試同考官錫嘏固老於場屋視

人文字珍重不敢忽略卽不中式者亦必詳其故而後落
之所識拔多者宿以父文煥年七十遂告假歸錫嘏在京
師三載淡泊與布衣時不異嘗畏寒欲作一被一褲而不
能然外吏有註誤者奉千金求排解笑而謝之及旋里杜
門郡邑守令想望丰采未嘗妄通竿牘生平從事於格物
致知之學嘗謂一事一物苟精神不到則此心危殆不能
自安而氣稟羸弱自其爲諸生授經糊口弟子旣眾惟恐
一人失學窮日講授矻矻不休雖背僕而不郵又處身廉
潔而宗黨朋友有緩急不敢以力絀辭卒年五十有四

黃宗

義撰墓志參寒
村集曹府志

盧宜字公弼稟姿穎悟韶亂能文章爲人孝友剛方不習

世俗脂韋之態康熙五年舉鄉試十五年任蕭山教諭修學宮堂廡規模法物禮器靡不整飭邑有楊時祠名道南書院前明時魏驥曾講學其中宜率諸生祠兩公必考辨經術取其有裨於世者以大用策勵之且保全善類不遺餘力諸生毛奇齡以亡命之餘歸里怨家多相齟齬又以制舉荒落連試下等宜獨奇其才拂拭之備至故事督學使行部必敕所屬學舉劣以示懲勸而宜所報祇以優不以劣詰之曰他郡自有平原自無也終其任無一生以劣報者丁母艱歸二十三年補嘉善教士寬嚴有法振文風勵品行居官稱職明年授鎮遠知縣地爲滇黔門戶郵驛如織自上官往來與客使之至止者凡輶傳置遞多以居

民任力役而亭堠閭賂有擾及民舍者宜一如蠲之民役以官僱而公私置舍各有界畫居民輿然稱數百年來所未有伐石勒碑於縣治西中山之陽旣而積勞致病遂乞休民留之不得各率婦兒送出境嚶咷而返歸後家居二十餘年杜門著述尤究心史傳諸書卒年八十宜工書法旁通繪事以墨蘭著名然中年後不復肯落筆以故人益重之

毛奇齡撰墓志參兩上者舊詩紹興府志

謝師昌字維賢一字鐵戒泰瑞之子歲貢生少時遇寇亂負母夜行十里外避之時正嚴寒兩股盡裂見者皆稱其孝康熙二十二年授平湖訓導學校毀廢已久師昌籌畫修舉不半載告成勤課諸生貧而有志者尤加意獎勸士

競以舉業就質戶外之屨常滿雖修脯不具不計也凡經指示後多中甲乙科後佐令輯邑志秩滿遷南雄府經歷

不赴

案平湖志言陞江西經歷誤

以老乞歸師昌於書無所不覽詩文

俱古字學鍾王其學尤以參悟性命爲主嘗趺坐終日澄心返觀年七十一卒弟樹昌字瞻修歲貢生博學敦行恬

靜不慕榮利與兄竝負人倫之望

平湖縣志參詩文草創乾隆志

崔大升字爾尙八歲能文邑令龔彝許字以甥女十二赴童子試學使者面試以經書二藝皆立就旋食餽後由歲貢選常山教官進諸生講禮讓攻經史人咸知奮值耿精忠叛遣賊犯常山直入縣大升危坐明倫堂弟子侍者十餘人賊異之莫之犯時變起倉猝文武各篆皆失獨大升

以所受印上特授國子監學錄門人御史謝兆昌遣人迎

就職卒於京邸

唐志
案

陳學聖字爾至學詩從弟幼秉殊姿年十五應童子試邑令周家齊稱其文有臺閣氣象康熙二十六年舉於鄉鹽使者聞其才邀主講席四十六年選授四川南川知縣勸民墾田陞課公私賴之蒞任二載廉慎自持齋廚蕭然晏如也巡撫題其署曰風清琴鶴將具疏擢用忽構疾卒年五十一士民爲之涕下

乾隆志

胡起祥字本立家貧好學少時其親作粉資市中起祥從親旋行石礪前手持書卷弗息也夜則繼以火鄰人謝緒光見其狀憐之資以筆札弱冠補諸生第一自是連試輒

爲學使者所賞識名噪一庠爲人能自好文詞雅潔處交遊有始終邑子弟多樂聞其講論歲以授經束脯供其親與弟室中蕭然而處之晏如也年三十餘卒其病時薛士學往視之起祥猶以晉書諸臣傳後贊辭相質問云

書巖集

沈景濂字會中諸生父從約字成則高才能詩有聲庠序早卒景濂天姿穎異博覽羣籍善文先後督學皆賞識之屢應省試不售日奔躓於饑寒困頓之中乃仿仲長統樂志論自序其文曰使有田足以給饘粥有帛足以備寒溫婦子室家之計不營於慮以一其爲文之心而又聚書始於充棟醲秣底於如泉暇則尋金谷之勝遊集梁園之賓客把臂劇談以廣其爲文之說又或結廬林石吐納煙霞

雛姬爲之具饌俊童爲之司茶息影避塵微吟長嘯以幽
其爲文之趣且又著屐而履巉巖買舟而泛浩蕩名山巨
壑縱覽流觀以博其爲文之氣如是則拈毫弄墨快吐胸
中洋洋灑灑何愁不工不然者心方役於口體識方病於
寡陋趣方苦於囂雜氣方憾其窘縮吾恐一縷枯腸搜索
何益以求文工文胡由而得工若予今日所處蓋亦有然
者也然則予之是帙也豈遂可以言文也哉其自抒感慨
如此兼工書法尤長於詩同里謝兆昌謂其出入於晚唐
南宋閒天然秀色映帶眉宇俗韻總不入其筆端未幾竟
死人皆惜之

蛟川備志參
詩文草創

鄭道馨字鳳池家貧力學有幹略海寇劫之入海欲畱之

不從脅以刃道馨厲聲曰我豈從汝作賊者耶遂受害諸

第毀家以贖其尸

唐志
彙

莊上駟宇房仲諸生博覽羣書性甘恬退或有勸之圖進

取曰吾所慮者未能修德立身耳何暇念切功名退居小

軒教授後學著有四書講義年八十九卒

唐志
彙

陳煌號半村性聰明詩賦詞章一覽成誦幼習舉子業應

試輒高等竟數奇不得舉於鄉復連丁父祖艱乃絕意進

取泉石自娛扁其居曰村樂窩并作文記之以見志焉至

耄吟詠不輟優遊以終

唐志
彙

項公肅字可欽安貧嗜學博覽經史志慕高逸不一試有

司惟以教授生徒成就後進藻行飭躬恂恂若處子夫婦

相對以禮有梁孟風子爲寇擄乃隕宗祧士林悲之

唐志
稟

張維藩通經博史持守剛介康熙二十四年拔貢入太學
考授內庭教習期滿需次知縣聞父喪奔歸哀號廬墓終
不赴選有語及必垂涕曰吾以在都不得躬含殮尙忍舍
邱墓遠出乎歙縣唐鴻舉維藩同年生也在成均最相友
善及鴻舉來爲邑宰造訪數四維藩僅於公事一見後卽
屏迹不再入徜徉泉石而終

乾隆
志

方范字經庵諸生性峻介不屑屑舉子業然試輒高等遊
京師設教霸州門多賢達生平博覽羣書尤精易理著有

薊閩集

乾隆
志

湯海六生而穎慧博覽羣書遊樵李得名師受業歸謹言

飭行不妄交一人事父母尊長動遵古法年五十隱鄞之

小溪山歿有異徵相傳爲山神云

乾隆志

陳夢蓮字仙佩一字省庵京四世孫好古博學爲諸生有名郡司理何可化倡觀瀾社會文夢蓮與陳錫嘏廬宜皆深爲賞識屢赴省闈不售末以一字之疵見置遂棄舉業不復應試惟以著述自娛經史皆有箋注尤邃於春秋嘗台公穀左氏及胡傳較其異同因文析義必求合於筆削微旨名曰春秋定論邑志自尙書張時輟纂輯後百餘十年未修夢蓮歷訪前賢紀載古老舊聞隨得隨錄適令唐鴻舉延修邑志遂成完書

案乾隆志虞爾錫傳康熙六年令王元上延爾錫與陳仙佩周

方人謝孚吉同修邑乘未付梓而謝卒是夢蓮前此亦嘗修志至是乃成完書耳

至今蛟川文獻

有徵夢蓮實爲功首焉

雍正府志參蛟川備志

子丹誥字箴六諸生

能詩文有集孫錫光自有傳元孫渭官湖北建陽鎮巡檢

有政聲

采訪冊

陳世宗字嗣完少受業於姚江蔣茂沈爲有本之學敦行博古卓然不徇俗尙爲諸生五十餘年公庭絕迹未嘗妄干人所居僅蔽風雨授徒自給而已喜飲酒舉杯數巡輒曼聲長嘯有悠然自得之概出則殘衿破履蹣跚行道中遇之者見其步中規矩皆肅然起敬年八十同里謝兆昌贈以文稱爲古之狷士

閒居集參乾隆志

傅嘉說字公選弱冠補諸生康熙二十四年由拔貢

案原作乙

丑數之係康熙二十四年邑志選舉作十一年誤

官敎習期滿授州同嘉說念先

人未安窰窰不赴任而歸邑崇邱鄉賴鄞東錢湖水資灌
溉而何家洋一帶爲湖水所必經鄞民議築壩塞之工且
成矣嘉說適至其鄉里民環告此水塞則旱暵無藉農人
何所仰食嘉說毅然謁郡守具陳不當塞狀守履其地按
視語嘉說曰如君言卽下檄毀私壩復古道如初鄉民至
今頌之

乾隆志

傅家讓字公孝諸生工詩文負異才與同里謝師昌謝緒
章邵元觀王諭諸人友其西郊別業曰友石居有園亭之
勝每置酒延名士吟詠其閒風流爲一時所稱

坂川
備志

李時培字天因少孤母性嚴時培曲意承順讀書砥行爲
邑名諸生好蒐羅鄉邦文獻於忠孝節義之士得其一篇

一什尤珍藏之弗敢褻兼精岐黃術以濟世康熙四十七年歲貢子士瀛有文譽乾隆元年舉人

乾隆志

朱文懋字修來少讀書以魯聞苦爲文未工齧唇流血以自勵遂貫通經史著易纂先後天圖說四書輯略親亡廬墓盡哀年三十妻死不再娶第韶懋質敏學博撰述甚富性篤孝友敬事伯兄沒身不析箸其學行多得自文懋編

修陳錫嘏顏其堂曰二難

乾隆志

薛應旂由舉人爲山西知縣官甚清廉及死宦橐蕭然貧無以殮民皆哀之

應旂志

鍾韶字子夔諸生酷嗜古文才情豪宕家貧授經爲業南鄉後進皆藉以造就性尤高潔數十年未嘗入城當事招

之亦不往晚益好學年逾八旬手不釋卷惟對海角雲生

吟詩以自得鄉里皆推重之

乾隆志

陸藩字价人號匪莪明工部侍郎陸道孫幼英敏淹博年二十食餼於庠由薦辟爲都昌教官整頓士風肅然一變屢任星子瑞昌彭澤知縣興利剔弊所至多異政陞鬱林知州以疾辭弗赴家居敦品爲後生矜式嘗曰讀書第一著要存不好名念爲官第一著要存不貪財念自扁其居

曰愛廉齋

乾隆志

林佳果字聖期少嗜學能文及長補諸生益究心宋儒理學書常以莫萌事上過不去心莫行心上過不去事十六字書座右警郵張某故業儒訪舊來鎮海道遇亂兵刃傷

其背斃而復甦暮叩佳果門卽止宿爲調治至痊始歸解衣以贈其師項公肅子爲寇擄遂絕嗣及歿佳果殮而葬之如父母禮時海盜蠭起獨相戒不入其里康熙三十八年邑令唐鴻舉書士林模楷以旌之年九十二卒

乾隆志

王錫庸字章武幼穎異長補諸生受業於薛士學陳錫嘏俱器重之晨夕研究經史無不造其堂奧暇則寄情詠歌脩然自得與人交胸無城府康熙三十八年中副貢肄業成均二十餘載困而歸猶日夜鑽研耄而彌篤不以得失顯晦介於懷也

乾隆志

方遇字五玉號雪巖敦敏力學太學生授江西萬年丞邑令某恣行虐政居民騷動勢洶洶不可遏巡按以遇得眾

心檄往諭之民乃安輯秩滿陞貴州平越令時兵卒橫行
邑中值歲饑四方負米入城輒爲邀截米價頓昂遇入見
總鎮請以倉粟豫給兵丁四月糧兵感其德不爲暴遠近
米得通於市有酒家壻夜死於刃鄰里執其妻鳴官鞠之
則婦與夫素相愛遇疑之後廉知其壻有狂疾歲閒發嘗
無故自刺其股傷痕宛在獄遂定閹邑稱爲神邊境有苗
人部落爲患巡撫欲勦之遇曰不須以兵力勝也一日潛
以兵伏要隘而已肩輿徑入其地土司見遇惴惴留之飲
臨別率頭目送之出境伏兵起無一脫者邊蠻竟平擢江
西甯州知州未抵任解組歸囊橐蕭然年八十七卒

乾隆志

鄭宗璧字嘉穀以明經授新昌訓導庠士樸茂敦古諠

贊皆從厚宗璧曰余自入學至需貢未能修弟子之敬於學官今不應多受聞者高之歲時諸生餽遺或卻或否卻者愧曰吾未嘗慢先生何見拒曰終年不見文字非慢而何於是皆以其文就教手加評隲不少倦及卒士咸泣而弔焉

乾隆志

王錫卣字釐一號遺安諸生邑學租嘗裁撥他款錫卣告於所司復焉夙工舉業及門得其指授者多脫穎出而自困場屋以歲貢爲常山訓導邑久無科第錫卣至以課及門法課庠士未幾諸生姚士瑚舉於鄉人以是益信服年逾八十卒

乾隆志

王重時字寅叔以歲貢授樂清訓導年已九十二矣子白

強慮父老畱之重時曰吾血氣非衰者遂往四年告歸學使者汪懷帖校士甯郡詢重時於廣文召見動履猶平時以餘俸優贍給旌曰百齡儒範年九十八無疾卒

乾隆志

陳二雅字安雅幼工制舉藝試不售絕意進取教授鄉塾所居斗室不蔽風雨匡坐吟詠恬如也每遇二親諱日必作孺子泣康熙八年舉鄉飲年八十九卒

唐志
纂

徐來字雲生生平質厚率直與人交忘機械人亦不敢欺家貧晏如有材官寓居其妻美嘗乘閒挑來來毅然不爲動時人以魯男子比之餽於庠將及貢而卒

乾隆志

虞廷侃家貧讀書工詩文不求聞達嘗著子臣弟友論各一篇晚精於醫其從父嗣槐厚於貲無子廷侃序當爲後

以母寡兄病弟幼堅辭嗣槐遂別立嗣而廷侃室懸磬安
之如飴鄉人咸謂可風近時之爭繼者

乾隆志

嚴大賓居近浹江耕餘輒釣遇學者勛以勤讀遇農者勛
以力田遇賈者勛以務實嘗曰人各事本業上不負盛時
下不罹文網便是世上神仙邑令黃宮柱每赴郡見大賓
臨水持竿怡然獨坐一日停輿詢之賓曰非吾業也亦樂
吾志耳令大稱歎表其廬曰江濱逸叟年八十餘卒

唐志

石美璠少聰穎好讀書因家貧親老力事稼穡仍手不釋
卷常以禮法自持跬步不苟有悍者橫逆百端人所不堪
美璠終忍不與較年六十餘公庭從無一至課子翰幹彬
彬爲端儒

乾隆志

范章先字允文本鄞人隨父徙於鎮海遭際艱苦刻意經史弱冠餼於庠邑令黃宮柱課士書院每嘉其文宕逸多奇氣令諸子受業門下章先敦品行自授經外絕不與聞一事日夜攻苦成目疾年四十餘賫志以終章先兄早卒嫂章氏年少孀居周恤曲至以完其節初裁學生廩給章先力言於上官分學租之半至今食餼者猶傳誦之

乾隆志

鄭維馨字來宜諸生工詩同里謝泰宗每當花開時招艾達時薛士學諸高人飲宴維馨與焉和泰宗菊醉吟至百首泰宗卒之前一日維馨自蕭山歸泰宗喜曰吾久不見子曷從我飲乎其爲先達所契愛如此

書巖集

謝岐昌字豐臣泰履子才氣豪邁由廩貢生候補中書効

力河工康熙四十四年

聖駕巡視豫省岐昌以清口防險阻紆十數里奏對明敏
聖祖嘉之命署兗州同知防曹縣明年六月黃河潰決民
多沈溺岐昌日夜焦勞捐俸爲倡募役夫築石隄民感其
意踴躍而集工竣咸稱爲謝公隄政聲大起授彰德河務
同知浚洹衛漳三河以濟漕運溉民田洹河東有故道通
運河歲久淤塞力請開復商民便焉擢南康知府以廉幹
聞尋乞休歸岐昌爲人好施濟有姑老而寡迎養三十餘
年歿爲之殮且恤其後人友沈某家貧年逾五旬未授室
因助貲完其伉儷浙省游饑營捐粟八百石以救荒全活
無算云

蔣陳錫撰序
參乾隆志

謝緒光字敬躋泰宗孫父晉昌少好學年十六補諸生居父喪哀毀骨立性好周恤有友某貸其金病且死袖券往視對而焚之邑覺宮敝告諸當事躬督其役新之以貢生終緒光天才穎敏由拔貢官國子監典籍歷工部都水司主事屯田司員外郎遷刑部貴州司郎中奉

命督理街道康熙三十年出爲雲南驛傳道兼鹽法事恤竈丁寬商人悉更宿弊甫三月丁外艱服闋補陝西洮岷道土司爭地率部下仇殺抗拒官司緒光單騎往諭曉以國法眾番服罪執巨魁二人重懲之終緒光任無構煽之覺土豪趙葵倚上官勢侵蝕隴西糧腳價數千金緒光立擒予重杖追價給民民大悅服尋乞養歸再補濟東道未

赴任卒子曾祚字貽堂康熙四十六年舉人知雲南羅次縣有異政巡撫檄修通省地輿志規畫形勢能得其要不數月告竣卒於官從子純祚字季垣諸生工詩文尤善書畫性介而和里黨多樂與之遊年七十餘卒

王繼文撰傳參乾隆志校

川耆舊詩

謝緒恆字子朔得昌長子從父受春秋專於學問無棋弈宴遊之好年十七補諸生博通經史善詩古文詞康熙三十八年由副貢入成均考授內庭教習期滿以知縣用尋中五十九年舉人晚以著述自娛卒年七十五

乾隆志

子琦

祚字次韓諸生曾捐資助鯤池書院膏火曾孫國賢字觀光歲貢生積學能文絕不干預外事鄉人皆重之篋賢炳

賢別有傳

采訪冊

謝緒敷字敬在得昌子諸生幼穎異未就塾時慈谿姜宸英館其家買棹將歸值天陰霾緒敷朗誦如此風波不可行句宸英聞而異之及長爲古文道婉韻折有廬陵筆意嘗偕兄弟輩構書室梓山南麓邑令周家齊時過之論詩文因顏其室曰夾鏡晚年著述尤工爲人剛毅遇事侃侃敢言於人不苟許可有子五人教之最嚴遵允人訓亦以五經分授之後長子閔祚充拔貢次聞祚閔祚並爲諸生次聞祚成進士聞祚舉於鄉皆以文章著名八以爲義方之效弟緒高字子柔夙勵志行執親喪造次必合於禮由太學生試於鄉不售遂棄去舉業日究心朱

全書暨天

文地輿之學又取紫陽綱目與資治通鑑校其異同焚膏繼晷不知其疲友愛兄弟析產後復同爨數十年宗黨咸稱之云

書巖集參
乾隆志

謝緒顯字子臨得昌子諸生自少讀朱子或問語類諸書怡然有得反覆引伸不厭薛士學謂其能尊紫陽之學天性孝友見前人手澤必咨嗟珍惜祖秦宗詩文百卷刻甫竣不戒於火緒顯與諸兄弟節祭祀餘資重鉞之身董其役三年書乃成年逾六十生辰前一日遣小童攜僕被猶步行二十里至父墓下展拜冰雪襲人寒氣砭骨弗顧也孺慕之念老而勿衰如此

乾隆志

子書祚字萬言歲貢生承

父志奉朱子像禮之數十年如一日爲人丰神瀟灑工書

畫兼精篆刻後授慶元訓導年八十一卒

王世勳撰傳

謝緒守字子建年十五應童子試輒冠軍康熙五十九年舉於鄉砥礪廉隅授徒講讀邑之英俊盡出其門雍正間御史蔡某行部至聞緒守名延之相見禮畢御史輒揖其座曰聞君律已端嚴文章饒風力將以式多士此座爲君設也後五上公車不第卒於邸

乾隆志

謝緒敬字人輿別字小江師昌從子天性孝友博覽經史雍正元年貢入太學

廷試以海防爲問緒敬對言自古未有汲汲於海防者惟有明數百年被海口之害實釐由自啟耳明朝開國規模多善惟遺海島居民則失策之甚者他法能從久遠處籌

度至遣海島反爲東南億萬生靈貽二百餘年無窮慘禍
何所見之短且拙乎初命湯和巡視沿海所設墩臺城寨
頗爲周密後因小寇有警遂下遷徙之令盡思漢唐元宋
以來未聞以海賊而激變者縱少有跳梁旋即撲滅一旦
盡徙居民則小醜雖息而大寇反因之而起日久愈滋不
可掃除矣前數十年間尙苟安無事旣而奸民競趨其地
雖因倭亂而起然倭夷之首禍者爲數不多未幾皆內地
之人陸續嘯聚牢不可破卽無倭變勢必至此沿海赤子
多遭屠戮竭舉國之財不足挫其分毫嘉靖中總督胡宗
憲屢次出兵爲風濤所阻不得已而招降賊首汪直受詔
又被讒臣負約餘黨復入於海自此相繼而居島嶠不可

金華縣志 卷三
斷絕迄有明之世無甯歲矣要知海外居民眾多則漂流劫掠者無貯足之處惟虛其地使此曹得蟠踞其間零星彌漫遙相呼應朝廷雖日興師無如其出沒無常隱閃莫測何今

國家盡海外諸山任民耕植又移總鎮於定海此洞燭有明之弊爲東南百姓開永遠之利也而奉行者又多疑難之意如定海之衢山象山之南田皆有膏腴之田數萬畝因武弁憚於巡哨禁止不開近有人具狀開墾上官令文武會勘有司又徇營伍私情旋即報罷此皆在百里之內尙爾畏難則臺灣在數千里之外更將如何統觀古今漢唐元宋均無海寇之患獨前明爲之奔命不遑者豈非以

良田與區拱手與賊任其猖狂無忌乎又海口定例禁商船各帶軍火器夫寇盜恣行使商船無軍以禦是束手待斃也漢公孫宏請武帝禁民挾弓矢吾邱壽王駁之以爲不能杜絕兇邪顧以民所自衛者致罪是長賊畏而奪民救也宏無辭以對事遂寢公孫之謬正與今同尤可笑者商船之軍火器禁矣而奸人之軍火器又從何來乎蓋賊艘不從大關諸汛口以出沿海泥塗遼渺乘夜跋涉杳無人知則所逐一嚴查者止及於商船必不能及於賊艘也康熙五十一年廣西道御史陳汝咸有疏曰沿海歹船非挂號稽查所能斷絕其所駕小船必於深夜潛出其劫商止在內洋不往外洋外洋無礁礮可晝夜兼行賊不敢劫

內洋山腳雜出水路灣環商挂號必迂迴其途多船遂得
於其間邀截矣賊有軍器商船無之小舟往來迅速大船
進退遲緩安得不因此皆設法以便賊也凡巡哨之船當
以風信爲準春夏南風多各營哨船宜聚泊於南界秋冬
北風多宜聚泊於北界兵力增強宵小聞風膽落據上流
以操勝勢同於扼抗若返汎各舉雖望見商船被劫遇逆
風寸步不能前矣

世宗閱之大爲稱賞賜以御食尋爲雲和訓導以薰陶多
士爲己任九年

敕修浙江通志巡撫檄聘校訂總裁諸人皆器重之復輯

括蒼文存未梓而卒年八十

小江集參
乾隆志

賀宏聲字上振官湖南司獄盡心於其職獄鞫不可食輒更之捐俸置田以補不足妻董氏亦於冬日給囚棉衣去其敗絮易之以新時人稱其夫婦有隱德及罷官貧未能歸遂居長沙占籍爲善化人子士英孫國華曾孫啟曾世世以仁厚傳家尙書長齡御史熙齡卽宏聲之元孫也唐確

慎公集

胡昌陽字暉乾父儋字眉宇雍正二年舉人官蘆溝場大使升瀘溪知縣有政聲歸里後值邑令王夢弼修志邀儋同爲參訂昌陽天資敏達好學能文乾隆十五年中副貢歷任兵馬司副指揮通政司主事出爲陝州光州州判遷廣東茂名新興新會知縣擢南澳同知爲人孝友敦倫居

官三十餘年所至勤於其職爲大吏所器重年六十八卒

於家楊人謨撰傳

王諭字如綸一字雙浹諸生少負文名廉隅自砥既屢試

不第乃應幕府聘爲子弟師案乾隆志候大將軍開府浙江式肅請謁遺諸子受業焉

既而家居尤以吟詠自適酷愛宋詩擇其佳者皆手鈔之

其詩亦絕類放翁而出入於蘇黃諸家然源流實本之少

陵生平詩集最富雍正二年充歲貢不求仕進竟閉戶著

書以終蛟川詩話參乾隆志

武緒尊字掌言性狷介家貧益讀書潦倒場屋晏如也雍

正元年

詔舉孝廉方正邑令田長文問可以應選者僉以緒尊對

長文曰吾稔知其端士遂牒呈大府緒尊以父老固辭著四書講義至老不倦易簣時猶朗誦四箴端坐而卒

乾隆志

胡維炳字其佩一字蘆江篤於天倫平居讀書常以兄弟相聚爲歡諸姪待之如子雍正十一年成進士授戶部江南司主事以文簿冊籍胥吏易於作弊請於尙書欲奏改之遂與權貴忤乾隆四年出爲永福知縣嚴毅方正不苟嘯笑一意鋤強扶弱上官聞而嘉之言其剛介爲邑令中罕有然心仁慈折獄有可矜者退輒太息形於言色分校鄉試亦稱得士卒於任

陳志棠參五
於齋文彙

子垣字東白恩貢生

生有至性十歲傷母哀毀如成人
事繼母以孝聞女第六人悉嫁士族後有貧且嫠者養之於家親友以困乏告必

酌與之卒年七十三孫于銳自有傳

王宗炎撰傳

張懋建字介石一字石癡學伊子敦行積學通經史諸家言工詩古文詞雍正七年山拔貢生入成均祭酒孫嘉淦言其器識溫雅非凡材補官學教習既而浙江巡撫程元章薦舉博學鴻詞旋中順天舉人才名藉藉公卿爭延爲子弟師懋建不欲藉以梯榮仍日引諸生徒娓娓談經義不倦性尤孝行篋中藏其母遺像遇諱日每對之鳴邑復篤於友誼遂安毛桓以應詞科試畱滯京邸貧甚至三旬九食懋建輒分粟以贍之兵部侍郎雅爾圖深加器重舉爲國子博士尋出知福建長泰縣視城多圯捐俸創修濠隄雉堞整然完備邑有雙川坡義士陳耆所濬溉田萬餘

頃歲久壅塞奸民作埂爲田官皆置之不爲理懋建督役
疏通懲不率者大小圳悉復其舊最盡心獄事嘗脫瀕死
者數人俗素刁悍以禮化之輯學校祀典考置祭器樂器
重葺泰亨書院祀朱子延碩儒爲掌教選俊秀肄業其中
復修縣志手自披校邑之文教大興乾隆十五年爲鄉試
同考官所得八人皆名士侯官陳榮溶漳浦藍應元泉州
洪應心咸先後捷南宮而泰邑售者二人卽其平日所造
就也會大吏檄勘郡之八房山山夙爲逋逃藪懋建巡歷
五日夜竟以勞瘁致疾卒年五十士民感其德政肖像以
祀

案

浙江輯軒錄泰邑向有
六賢祠遂奉公爲七賢

孫本均字郢荃諸生好學能

詩以懋建所輯蛟川耆舊詩未竟其業爲搜補舊聞編次

成之曾孫錫申字嶽生諸生言行誠篤恪守先型年九十

卒

藍應元撰墓志參乾隆志
文獻草創蛟川者舊詩

謝善祚字明則功昌孫家貧力學沈酣經史精於舉業兼工詩古文詞以及書畫篆章術數之學無不究心久困童子試遂入武生籍因母氏言棄之旋補博士弟子總兵林某延課其子一見歎曰此古大人先生道範也雍正十三年充選拔未幾卒年四十一士論惜之

李世廉撰序
參乾隆志

楊沃洲字雲敷父美鉉恩貢生授經里中邑之高材生多出其門沃洲天資穎敏讀書無閒寒暑性恬淡不以利欲奪其志喜吟詠與劉賓王王文麒相倡和中乾隆二年進士旋卒文麒字之仁諸生能詩有集

乾隆志參
蛟川詩話

謝開祚字悅如別字濤山得昌孫少而好學工詩古文詞
父緒敷早卒事母以孝聞乾隆七年成進士授甘肅鎮原
知縣地僻民貧屯糧借放若不能償請於上官豁免之俗
悍而性樸直聞祚潔已奉公教以禮讓民大悅服凡視獄
非甚大惡則諄諄諭之如對家人故捶撲不煩而訟日稀
邑有漢高士王符墓久而圯聞祚捐貲新之并梓其潛夫
論全集以行世會邨有瞽者以符咒治病稍驗鄉人爲之
醺金會眾酬神及醫鄰邑武生朱某謀地不遂誣以謀逆
訴於御史臺遣官會訊囚泣言愚民甘受刑勿累我慈父
母眾皆大哭鞠者色動乃白其枉然聞祚終以失報罷歸
出國門時列酒餞行幾無隙地歸二年授四川甯遠府經

金江縣志 卷三十三
歷謝不赴卒年六十七

姜炳章
撰墓志

李琦字次韓諸生積學能文操履端方好讀宋儒書其講學由博返約而歸於盡心知性後進皆推重之康熙四十八年郡邑教官舉琦德行學使者吳垣以東浙儒宗表其

宅

乾隆志

胡圻字載青一字東郊維炳從子生具慧質博覽羣籍爲文握筆輒成唾視貼括家言意氣凌厲一世未弱冠補諸生乾隆十六年成進士授井陘知縣地近京畿號稱繁劇而圻吏才甚長應之裕如操守尤清介不肯阿附上官竟坐是罷職二十二年

高宗南巡圻隨巡撫迎鑾道左蒙

恩賞復原官旋卒年未四十士林惜之

謝閭社撰誄
詞參陳志彙

陳良佐字帝賚一字卓巖幼勤苦好學不閒寒暑長而工制舉業有聲庠序乾隆二十二年成進士授廣西博白知縣心安澹泊不逐時趨逾年以註誤歸家居日手一編老而不厭未嘗偶與外事後邑令重其品延主鯤池書院十數年講學論文詳盡有法從遊之士掇巍科者不一人生平著述皆有成書藏於家塾年八十四卒

陳志彙

李煊字光天乾隆二十四年舉人授西安教諭陞知徐州蕭縣居民苦水患糧多積欠大吏檄令追比煊捐貲代解民咸德之部內有爲巡道健卒者倚勢賴賃宅錢數千不償踞室自如主人訟諸官煊杖責而逐之闔境稱快尋丁

艱歸服闋補甯國太平縣以疾免官

沈業富撰墓志

同時孫煥字

堯章由舉人官江蘇知縣署太倉州操守廉潔及罷歸官

橐蕭然

采訪冊

陳錫光字載之一字秋巖夢蓮孫父丹雋篤於親誼昆弟
四人早析產及兄丹詔卒遺有寡嫂幼姪與女丹雋悉收
養之復同居十餘年至姪受室始再分爨宗黨稱之錫光
幼失怙事母孝長而潛心經術雄於詩文乾隆二十六年
成進士授江蘇陽湖知縣丁內艱服闋改官粵東歷署始
興河源咸以仁慈著譽尋除靈山隆學校嚴保甲興利除
害政聲日起二十四年邑大旱歲苦饑錫光捐俸賑濟次
年秋潦水暴漲冲陷廬舍無數躬自往視給貲撫卹民皆

頌德凡在靈山十五載治平化和有古循良風卒於任年

六十八

張所受
撰序

兄錫璋字石麒麟性友愛錫光讀書登第多

其力并能惠周宗黨錫光宰粵以已官貲贈焉子元枚字

蒼亭氣度嫻雅生平未嘗出惡言旋舉於鄉卒年三十三

陳景沛
撰傳

錫光友林秉璐字獻珩諸生少有才名隨錫光客

嶺南垂二十年晚年歸里詩多散佚

蛟川耆
舊詩集

范翔字漢羽都指揮謹之孫讀書循理勿干仕進後學多

從之遊尤工於詩其詠芙蓉七律傳誦一時

蛟川
詩話

王世勳字凌衢一字賸樞又曾之後十歲作文讀左氏傳

卽能貫穿全書之事長益博涉羣籍其說經多主郝敬及

近人毛大可之論窮研有得不襲故常士林稱之乾隆二

十七年舉浙江鄉試第一後四年成進士四十一年授永
安知縣修葺鐵潭書院親與諸生講說文藝士皆欣欣嚮
學太學生鍾清麟蔽盜前令多隱忍之世勳輒治其罪民
用安堵盜夜殺鄉民陳槐佔捕之不得主名隸見黃亞三
者衣有血痕疑而執之世勳按視非實遣去會分校鄉試
攝令陳某謂世勳故出人罪上之郡守撤闔世勳請寬限
追緝果得正凶義容墟民械鬪攝令以聚徒結盟羅織成
獄株連至數百人世勳詳讞得情事乃寢政聲大起巡撫
李湖謂其清慎且勤擬以崖州知州遷補適世勳有疾辭
不赴未幾卒年五十三世勳性孝居父喪勺水不入口者
三日事母益謹與兄最友愛其之官不攜妻孥獨偕兄行

待三黨亦有恩誼云

袁鈞撰傳參蔣學
鑄樹人堂文彙序

鄭觀瀛字登洲諸生以優行餼於庠性孝蚤喪父事母極其誠敬與人交始終不欺生平惟讀書是好工舉業兼善詩古文詞其品行學問時人擬之薛士學屢膺鄉薦不售士林惜之歿之日同里陳良佐私諡之爲潛學先生

陳志
彙

張懋延字東賢一字雙山學伊子拔貢生幼失母執喪如成人禮父卒哭泣盡哀及葬舂鍤輦重身董其役體素羸勿恤也伯兄及弟歿撫諸姪如子性嗜學研究經史抉奧摘微俱有心得著述甚富其搜羅舊聞尤足備鄉邦掌故
乾隆十六年

高宗南巡懋延恭獻詩賦

召試錄取二等

恩賜荷包一對年六十七卒兄懋迪生有慧質年十五補諸生第一早卒其師謝闇祚哭以詩有人世難招佳子弟天工亦忌好文章之句從子志銘字西傳歲貢生年八十尙工楷書不廢吟詠

李昌昱撰傳參蛟川耆舊詩

楊源字昆孚施天被字光遠皆受業於謝闇祚工吟詠與張懋延相倡和懋延謂天被詩如啼鳥鳴林和聲可愛源詩如春草池塘獨擅嫩綠源中乾隆六年副貢天被以諸

生終

蛟川詩話

韓崧岳字亦申諸生工詩督學馬豫校士甯波以蚶田蟹帆鰲石鰌墨蝦杯螭房江瑤海月命題取崧岳詩爲閣郡

第一其詩雅麗適逸一時士林競相傳誦同時沈德長髯修幹好弈棋能吟詠以蜆魚詩著名

蛟川詩話

陳錫卣字起周夢蓮孫諸生工詩文好搜輯故老舊聞嘗應知府曹秉仁知縣王夢弼之聘同修郡邑志生平篤於交道其友傅仲翹娶妻數月卽浪遊他方錫卣旣恤其家復念仲翹不歸何以延其宗祀乃自攜襖被獨行數千里至廬州之合肥得仲翹音耗歸而具貲斧令其妻弟護孥以往仲翹遂夫婦相聚焉錫卣晚景優遊構雅哲園置書千卷坐臥其中卒年七十四弟錫瓚字鬯侯少貧業賈郡城一日拾銀途中畱待其人還之主家訝其晚歸以實告勿信也及失銀者踵門叩謝始知事之不誣云錫卣子元

松字麓濤乾隆四十一年舉人能詩兼善書法爲人跌宕風流與鯢池書院山長許寶善飲酒倡和後授黃巖教諭未之任卒

陳景沛撰傳

陳錫蕃字康侯一字復庵夢蓮孫歲貢生積學能文受業於教諭邵向榮質問經史相與辨難往復向榮甚契重之爲人持己嚴待人恕孝慈之行著於鄉黨乾隆四十二年授溫州府訓導甫兩載卽乞歸卒年八十二

邵晉涵撰傳

子元

林字西園諸生善畫工詩詞以數奇不遇自譜明張靈乞食圖曲以寓其意性好義友李某家貧親柩停十餘年爲斂資營葬某卒又經紀喪事卹其子至長乃止人高其誼

元棧別有傳

陳景沛撰傳

陳元桺字北雲一字惺齋錫蕃子少好學博覽羣籍尤喜
讀莊子東坡集嘗曰昔人莊蘇竝稱信不誣耳及爲古文
汪洋恣肆酷似二家詩亦善抒其性靈同輩皆推重之乾
隆四十五年舉於鄉屢應禮部試不售客居京邸日以吟
詠自娛絕不干謁朝貴旣而歸里授徒爲業後進經其指
示者多掇取高科爲人寬厚和平能守其家風晚由大挑
以教諭用未補官而卒年五十餘

陳景浦撰傳

子景范字友韓

工詩文未弱冠以蜜苦膽甜賦受知於學使朱珪後高才

不遇以歲貢生終

蛟川詩話

徐文彬字時進諸生天姿敏異涉獵羣書工詩古文詞事
親最孝孺慕終身弟在中蚤死卹其婦甚至課姪芬讀書

成名待人樸誠後進有以文就正者指示不倦

陳志

同時

丁六鰲字雯北乾隆四十八年舉人精制舉業尤深於易學好周鄆窮乏有古誼士風鄒珪諸生守貧力學立品清

介鄉人莫不重之

采訪冊

嚴殿颺字存義白少嗜學弱冠補諸生爲文多驚人語教諭邵向榮極契重之說經皆恪守先型不敢少有離畔後進奉爲典型以恩貢選武康教諭卒年七十九第殿霖字

臣爾諸生工書法有才名

陳志

謝鵬祚字荀仲一字北溟諸生意氣豪邁工詩古文詞年三十餘出遊京師藩邸愛其才爭聘爲子弟師然屢試不售遂絕意進取日攜錢坐酒肆中拉屠沽兒與飲既醉而

返或忼慨泣數行下嘗自爲燕市酒人傳曰酒人不知其
姓氏逍遙燕市率直坦懷人以酒召靡不過不合輒起去
大厦朱門睥睨不至而最善於達人韻士遇僧道多拱揖
以迎燕市莫不知有酒人蓋酒人非燕人也兩遊都門衣
食奔走未嘗露其窮愁氣謝子北溟遇酒人於燕市見如
故歡過避塵軒酒人講帳處也入其室蕭然囊橐座上無
檀出所著詩併論說傳記不能工而感憤牢騷直抒胸臆
始知酒人非藉麪藥作生涯者是夕酒酣悲歌呼嘯謂天
地閒可驚可愕可涕可號之事往往畢聚於文人之身說
者謂造物忌才置之不用如劉伶陶潛李白輩暢情適志
以酒自娛而吾之逃於酒也昌黎所云齷齪者旣不足以

語之而磊落奇偉之士又不能聽焉信乎命之窮也命窮而藉酒以雪吾愁非實有所懌然者酒人語北溟曰吾閱人多矣惟子性情遭際與吾合轍盍爲我狀之余識酒人里居而姓氏不爲余知其殆燕市擊筑之流亞歟因爲酒人傳酒人必揭甕撥醅更當浮大白也蓋鴟祚以之自述云鴟祚性好施與路遇窮乏者囊無長物卽解衣付之不少吝後卒於都人皆懷之遂旅葬焉

金臺雜著

王聘三弱冠補諸生以高才食餼爲人踐履篤實敦節誼重然諾與人交和平樂易直抒胸臆蓋躬行君子也卒之日門人曹某方病見聘三至儀從甚眾自言爲神云

陳錫光撰

傳

任于宗字鷺川一字茗香少好學工詩文年十七補諸生立品端方爲學使寶光齋所器重乾隆五十四年由拔貢舉於鄉是科邑之同獲雋者爲陳元枚人號雙璧以二人學行皆士林所推仰也尋入都充覺羅教習期滿授福建建甯知縣操守廉潔爲治寬厚有古良吏風道光四年分校鄉闈得士葉申薌等後多入詞林旋丁父艱歸遂不復出家居讀書如諸生時絕不干預外事邑令郭淳章延爲鯤池書院山長日以經史課士肄業者誦聲朗然故其門下爲文咸有根柢時先後山長嘉興王元啟仁和陳鴻慈谿鄭動俱負宿望于宗名與之埒卒年七十餘

聽思堂彙

沈謨字禹功一字龔山斗匡四世孫積學能文乾隆五十

三年受知學使朱珪充選拔生是年秋卽中副貢入都考
取正白旗教習諸名士如盧坤史評等咸從之遊後俱爲
顯宦有聲謨尋以教習期滿選授湯溪教諭在任十八載
整飭士習歷久不倦嘗訓諸生曰讀書人不可不知造命
又不可不知安命知安命則有守知造命則有爲識者歎
爲名言年六十七卒於官

陳福熙撰傳

同時陳瑜陳蕙陳修淦

皆高才善詩文稱蛟川三陳名重一時瑜字墨薌嘉慶六
年舉人蕙字嘯廬嘉慶六年拔貢修淦字金水嘉慶十三

年舉人

采訪冊

胡于錠字漢傳一字屏山維炳孫善詩文乾隆閒由廩貢
生肄業國子監期滿以校官用署平陽教諭補長興訓導

丁外艱起補蕭山又丁內艱諸生懷之延主筆花書院凡六年再補諸暨年已老而課士甚勤有無行者申戒勿悛或施夏楚甚者褫其衿縣令欲以私黜諸生于錠輒持不可是以士皆畏而愛之在諸暨又十有三年引疾歸日惟危坐觀書不輟卒年八十八

葉敬撰墓表

子沅字芷堂增生澧

字蘭皋歲貢生瀚字文叔附生潔字曉舟附貢生候補布

政使理問皆負鄉望從子湜別有傳

采訪冊

陳廣義字孟訓明善子性孝事親膳必躬治之不假手於婢僕及父母歿廣義年已近六旬寢塊哭泣盡哀依然孺慕生平湛深經術精於舉業後進奉以爲則品尤端方規行矩步雖市人亦望之起敬後由廩貢生署處州教授海

甯學正會稽教諭黃巖訓導所至必肅齋規諸生請業誨之不倦有貧乏者不受修脯嘗笑謂同官曰

朝廷定例新進生員見學師贊儀不過二兩近日校官竟有勒索加多者是以貪賈自居尙何顏司鐸爲人師乎聞者爲之凜然年八十卒

劉赤江撰傳

陳廣霖字慶亭昌壽孫幼穎悟好學能文年十六補諸生天性肫摯事親能得歡心及歿念之輒泣然流涕當食爲之廢餐終其身如一日生平尤好義舉鄰人負子母錢千餘緡以屋爲質越數年力不能償廣霖竟還其券友人任某死而無子其弟年四十亦無出廣霖爲之納妾逾年被出有娘果生子其弟以告廣霖令後娶者還其子是年弟

之婦亦舉一子任氏兄弟遂各有後人咸頌廣霖之德乾隆五十三年舉鄉試嘉慶十三年由大挑攝雲和訓導值歲饑鄉民請開倉賑濟有司狃於例持不可廣霖白諸縣令謂地處山僻商販不通如必待請而後行則民皆轉死溝壑矣請權宜從事而令欲得校官文牒歸謀諸教諭難之乃自具牘止列已銜以行事得濟全活者無數上官亦不之罪解官日士民盈城送至泣下明年授龍泉訓導在任十載勤於課士有以文就正者口講指畫終日不倦其不率教必嚴懲之情苟可矜雖事達大吏亦力爲申理諸生無不感之年七十卒於任

王曰升撰傳

倪沛潮字載韓中乾隆三十五年副貢沛顥字巨源諸生

皆從象山姜炳璋遊生平篤學力行安貧自處同校閱讀

左補義沛潮後官新城教諭

采訪冊